

Sinhcin Boux Giyezgyah Simndei Dauqma Hagdangz Gien Ngaenz Gien Doxgaiq

深圳企业爱心人士黄南美回母校献爱心

7 nyied 6 hauh, Vujmingz Yen Daibingz Cin Gingoiz Siujoyz ndaw hagdangz sing go haprwenz gyonglaz gyukgyad, nauhyied raixcaix, Gingoiz doengzyieng Vangz Nanzmeij sienseng daengj gyoengq simndei giyezgyah daj Sinhcin dauqma, gien ganghginz, cuzgiuz, buhvaq hagdangz daengj vwnzdij doxgaiq caeuq ciengjyozginh daengj gungh 7 fanh lai maenz. Vangz sienseng lij caeuq yaucangj ciemdingh 《Sawhezyij Gingoiz Siujoyz “Nanzmeij Ciengjyozginh” 》, hagdangz hix hawj Vangz sienseng daengj gyoengq simndei giyezgyah fat “Gvansim Daihlaeng caeuq “Ndiepgyaez Fouz Gyaiq, Cingz Lienz Gyauyuz” bonjsaw yungzyi cwnghsuh caeuq gepbaiz.

Vangz Nanzmeij sienseng dwg vunz Gingoiz, nienzgeij gaeng ndaej 90 bi, seizneix de dwg Sinhcin Si Hungzli Sawvehgvannj gvanjangj, Sinhcin Si Hungzli Swzsan Gihginhvei ciengx-lwenx yungzyi veicangj. Geij bi neix daeuq,

Vangz sienseng laeb vwnzva banggunz hanghmoeg, cihciz bang goeng' ik saehnieb, gaeng gien guh ndaej 19 aen maqmuengh siujoyz, bangcoh 4100 lai boux da, cungh, siujoyz gungzhoj hagseng doegsaw, son gyoengq ciengqgo, vehdoz dieg gungzhoj lauxsae 960 lai boux daengj hanghmoeg mbouj aeu cien. Bi' gvaq, de gien 10 fanh maenz hawj Gingoiz Siujoyz guh ciengjyozginh. Gij cingsaenz Vangz sienseng ndaej daengz ndawbiengz haenhndei, ndaej bingz guh “Daengx Guek Goengik Saehnieb Senhcin Goyinz”, “Cungguek Gaijgwz Gaihfang Samcib Bi Bak Boux Vunz Okmingz” daengj cwnghueh.

Camgya aen hoih giensoengq neix lij miz ndaw yienh gvanhgunghvei, Daibingz Cin Cwngfuj, cin cunghsim hagdangz, cunghvei daengj mizgven lingdauj.

(Vangz Sauvuj/黄绍武)



▲ Vangz Nanzmeij sienseng fat ciengjyozginh hawj hagseng.

Mbanjbanjgya Dasingh Daeg-saek Bouxcuengh Noengznwd

太新县板价屯壮族特色浓郁



▲ Aen minzcuz gyangjangz ndaw mbanj.

Dasingh Yen Baujhih Yangh Banjgya Cunh Mbanjbanjgya dwg aen mbanj yienghndei minzcuz ndeu. Dangdieg vunzmbanj daenj geu buh dinj daengz saejndw, genbuh dinj daengz gencueg. Mbanjbanjgya ing bya dep raemx, bya heu raemx saw, raemxrij lae gvaq laj giuz, gingjsaek ndaw reihnaz heuswsgw; minzcuz funghcingz naekna, Bouxcuengh gofoux ciepsongq hek, fwengingqlaeuj, damzraih coininz, guh haeuxnaengj haj saek, daemceiz, eufwen, doz mae, daemj baengz, daemj man daengj minzcuz vwnzva caeuq fungsug baujhoh ndaej gig ndei; gangj vah, ndangdaenj, gijgwn, fungsug daengj fuengmienh lij baujlouz doenghbaez Bouxcuengh daegsaek, dwg Gvangjsih baihsaenamz minzsuz conzdungj vwnzva louzce ndaej haemq ndei he.

(Cinz Yenvaz/覃艳华)



▲ Gyoengq vunzmbanj seizhoengq ciengzseiz youq fwnz fuz neix eufwen.

Cauhbingz: “Din’ uqnaez” Vwnz-yidui Youq Singzmbanj Yienj Heiq

昭平: “泥腿子”文艺队活跃城乡

Gaenh geij bi neix daeuq, Cauhbingz Yen damqra laebbaenz “ung, guenj, yungh” sam cungj fuengfap neix beizyangj bonjdieg vwnzva yinzcaiz, gikfat gyoengqde haenqrengz cauxguh, roengzrengz beizyangj lajmbanj vwnzva lumj “gofaex ciengz heu” nei, dangqnaj daengx yienh lajmbanj gaeng laeb miz 60 lai aen “din’ uqnaez” vwnzyidui. Youq seiz hongsoeng, gyoengq nungzminz “vwnzyi gunghcozcej” ciengzseiz gag bien gag yienj heiqfoux, caijdiu, siujbinj daengj vwnzyi cezmuz miz gij heiqhom naekna bonjdieg haenx, bae daengz ndaw yienhsingz, ndaw cin, ndaw mbanj yienj. Cungj nungzminz yienj, nungzminz yawj neix ndaej daengz dangdieg vunzlai haenh, vih lajmbanj ndaej demlai cungj yiengh vwnzva noengzna ndeu. Ndaw doz dwg 7 nyied 7 hauh, Cauhbingz Yen Senhveiz Yauzcuz Yangh Mbanjdacungj nungzminz vwnzyidui yenjyenz baizlienhe cezmuz.

(Liuz Feih/刘飞)



Denzlinz Yawjnaek Beizyin Caeuq Guhhung Dajsiuq Ndawbiengz

田林注重培训和壮大民间刺绣



Denzlinz Yen nyinhcaen guh ndei beizyin, laemxsim fuzvu, coicaenh ciuyez, coengh cangyez fuzvu hozdung, cizgiz vih saujsu minzcuz mehmbwk ok geiqmaez, haenqrengz doigvangq minzcuz hongfwngz dajsiuq daegsaek demsou hanghmoeg gisuz, roengzrengz gya, gvangq saujsu minzcuz vunzlai demsou fuengsik. Ndaw doz dwg 6 nyied 22 hauh, Bingzdangz Yangh 210 boux canghdajsiuq ndawbiengz youq saefouh Loz Siufwnh lauxsae sonyinx lajde, doxbang hagsib minzcuz ndawbiengz dajsiuq, daemjbaengz, dajsan, caiznyib daengj gisuz, vih swncienz caeuq baujhoh ndawbiengz minzcuz hongfwngz gunghyibinj gisuz gunghcoz guh ndei maenhsaed giekdaj.

(Yenj Cinbyauh/冉俊彪 Ginz Gveiyungz/岑贵荣)